

四庫全書

子部

欽定四庫全書

子部  
玉海卷一百

詳校官中書臣張經田

主事臣祁韻士覆勘

總校官進士臣朱鈐

校對官中書臣方維甸

謄錄監生臣鄧肇槐

欽定四庫全書

玉海卷一百

宋 王應麟 撰

郊祀

祠宮 觀附

道家者流清靜沖虛歸真復樸後世說其風者觸類而長於是乎有演經鍊修之教延年祝釐之科報本通幽之訣上自后辟迄于臣民莫不鄉慕以祈效驗

此宮觀之祠所以興也

周齊宮

周語號文公曰王即齊宮百官御事各即其齊三日

周閼宮

見宮類

漢壽宮

郊祀志武帝元朔三年游水發根言上郡有巫上召置祠之甘泉

紀元朔四年冬行幸甘泉

神君言曰強與我會甘泉於是

上幸甘泉大赦置壽宮神君

注臣瓚曰壽宮奉神之宮也楚辭九歌雲中君曰蹇

將憺兮

壽宮神君最貴者曰大一其佐曰大禁司命之屬皆

從之非可得見聞其言與人音等時去時來來則風

肅然居室帷中時畫言然常以夜天子祓然後入又置

壽宮北宮張羽旗設共具以禮神君神君所言上使受

書其名曰畫法所言無絕殊者天子心獨意其事祕世

莫知也史記太史公曰予從入壽宮侍祠神語藝

文志泰一雜甘泉壽宮歌詩十四篇括地志壽宮北

宮皆在雍州長安縣西北三十里長安故城中 封禪

書鬼神接靈囿賓於間館 上林賦靈囿燕於間館

班固賦建章甘泉館御列仙

漢竹宮

見甘泉宮

漢陽靈宮

甘泉賦迺搜逮索耦卑伊之徒冠倫魁能函甘棠之惠  
挾東征之意相與齊序陽靈之宮注祭天之處故曰陽

靈之宮也

李周翰曰  
陽靈宮名

漢集靈宮 望仙觀

地理志京兆華陰縣大華山在南有祠豫州山集靈宮

武帝起 黃圖集靈宮集仙殿望仙臺望仙觀俱在華

陰縣皆武帝宮觀名 張昶華山碑世宗經集靈之宮

於其下想喬松之疇是游是憩郡國方士自遠而至充  
巖塞崖必雲霄之路可升蕃昌之福可致也 華山廟

碑武帝脩封禪省五岳立宮其下宮曰集靈殿曰存仙

門曰望仙中宗之世使者持節歲一禱而三祠建武之

元禮從其省但使二千石歲時往祠

又見桓譚  
仙賦序

西岳

記武帝巡省五岳裡祀豐備故立宮其下號曰集靈宮

藝文類聚後漢桓君山有集靈宮賦 水經注敷水

北逕集靈宮

漢郊宮

終軍傳專神明之敬奉燔瘞於郊宮獻享之精交神積  
和之氣塞明注師古曰郊宮謂泰時及后土



隋天經宮

志大業元年於東都固本里北起天經宮以遊高祖衣冠四時致祭

唐紫府觀

詳見瑞星

薛頤傳貞觀時為道士帝為築觀九峻山號曰紫府拜太中大夫往居之

唐太一觀

潘師正傳高宗詔即其廬作崇唐觀及營奉天宮受勅

直逍遙谷作門曰仙遊北曰尋真時太常獻新樂帝更

名祈仙望仙翹仙曲劉道合亦居嵩山帝即所隱立太

一觀使居之

永隆元年三月己未幸師正所居舊史云云別起精思院以處之太一觀本朝

為崇福宮

吳筠傳玄宗時還嵩山詔為筠立道館高宗

振其風於前明皇張其教於後關令尹傳曰尹喜結

草為樓精思至道周康王聞之拜為大夫以其樓觀望

故號此宅為關令草樓觀即觀之始也

一云周穆王尚神仙因尹真人

草樓在終南山之陰召幽逸之人尹軌杜沖謂之道士居于草樓之所號草樓觀

道經有叢

霄之觀明霞之館

唐紫雲萬歲觀

寶錄乾封元年正月戊辰朔有事泰山戊寅詔兗州置

觀寺各三所

祀日有靈鶴及山呼之瑞故也

觀以紫雲仙鶴萬歲為稱

寺以封巒非烟重輪為名

唐開元觀

通鑑開元一十九年閏四月迎玄元皇帝像置興慶宮

五月命畫玄元真容分置諸州開元觀

唐太清宮

見宮類 杜甫集朝獻太清宮賦鬱閼宮之律率圻元  
氣以經構斷紫雲而竦牆撫流沙而承雷紛瓊珠而陷  
碧燿波錦而浪繡今王巨唐帝之苗裔坤之紀綱土配  
君服宮尊臣商起數得統特立中央大樂在懸黃鍾冠  
八音之首太昊斯啟青陸獻千春之祥萬神開八駿迴  
旗掩月車奮雷騫七曜燭九垓能事穎脫清光大來  
金石錄會昌元年三月賈島撰新修紫極宮記

唐昇仙宮

紀天寶二年正月乙卯作昇仙宮丙辰加號玄元皇帝  
曰大聖祖三月壬子享于混元宮

唐軒遊宮

國史柴通玄傳所居承天觀即唐軒遊宮有明皇詩石  
及書道德經二碑真宗作二韻詩賜之

唐啟聖宮

唐書肅宗至德二年十二月詔天柱山老君廟改為啟

聖宮 文粹寶歷二年新建聖祖院于大茅峰下崇玄  
觀之前上直華陽洞之南門

賈餗為  
碑銘

唐望仙觀

紀會昌三年夏作望仙觀于禁中 六典凡天下觀總

一千六百八十七所 王遠知傳貞觀九年詔潤州

三茆山為觀俾居之璽詔曰立祠觀以伸曩懷

葉法善傳先天中舍景龍觀 張果傳至常山蒲

吾縣或言尸解帝為立棲霞觀其所 兩京記西

京景龍觀景雲二年天台道士司馬承禎被召止於此

觀

工部侍郎李適賦詩贈馬散騎常侍徐彥伯撮其美者二十一首為之序名為白雲記傳於時開元十五

年召至詔於王屋山置壇室以王屋所居為陽臺觀御書額

見本傳

景雲中作台州

桐柏觀天寶元年三月御書碑額

文粹崔尚  
桐栢觀頌

### 建隆觀

建隆元年十一月親征揚州二年正月以行宮為建隆

觀三年三月九日丁卯四月十一日戊戌十月二日丙

戌幸太清觀乾德五年六月二十四日開寶三年二月

十九日再幸建隆觀 又閭闔門外周世宗建太清觀  
建隆初重修改名建隆觀齋修率就是觀天禧四年正  
月十四幸建隆觀

太平興國太一宮

興國六年司天楚芝蘭言按太一式有五福太一天一  
地一直符君棊臣棊民棊四神大游小游凡十太一皆  
天之尊神也五福所在之處無兵疫人民安樂凡行五  
宮四十五年一移自甲申歲

雍熙元年

移入黃室巽宮在吳



分蘓州請就其地預築宮祀之迎福貺從之

九歌有東皇太一

中宮天極星其一明者太一之常居祠興于漢元光二年郊見于元鼎五年

六年十月甲午

蘓州言太一宮成楚芝蘭又言都城東南地名蘓村可

徙築宮于此以應蘓臺之名則福集帝都太宗曰太一

天之貴神也所臨之方民必受福今四海一家若立廟

吳中歲時嚴奉頗成疏遠

楚芝蘭傳上言京師百神所集今京城東南一舍而近有

地名蘓村於此為五福太一建宮則萬乘可以親謁有司便於祇事從其議令同定本宮四時祭祀儀及醺法

八年五月丁酉

實錄通畧作丁卯

遂詔有司就城南蘓村營建

命東上閤門使趙鎔董其役十一月己未新宮成總千一百區凡十殿四廊圖畫三皇五帝九曜七元二十八宿五嶽等神像五百二十四命樞密直學士張齊賢與楚芝蘭共祠五福太一用祭天之禮而殺其半昏祠至明如漢祀之禮每歲四立日行祭祀命近臣攝事用幣冊祝無牲祭命道士行醮禮又命廷臣內侍各一人掌之三歲一易以兵衛守九年甲申即雍正元年三月丙子立夏致享祠官咸集甘露降祠庭八月丙申先遣學士賈

黃中致祭丁酉帝親祠

一本云初就幄殿若有微風動幄出朱雀門嘉氣塞路入宮慶

雲環日如飛鳳龜龍之狀

祭告太一詞曰夫明靈之降難可度思精

意苟存必垂昭格顧惟寡昧嗣守丕基而德教未孚化源猶鬱日慎一日于茲九年苟非上帝垂休明靈降鑒則安得民庶和樂豐穰荐臻荷此殊休實由玄貺惟神功施造化道貫幽明握上帝之靈符作羣生之司命頃者觀臺效職保章獻言以為躔次所經將莅斗牛之分永惟靈馭下屬句吳且欲伸蠲潔之誠豈復以封域為

限載營間館卜此近郊庶苾芬之儀親承祀事颺歆之  
駕時覲神光納九有於胥庭躋蒼生於富壽但以正辭  
而陳信敢言秘臆以求恩淳化四年三月己丑朔司天  
言按太一式來歲太一君綦臣綦皆臨宋分至乙未歲  
民綦亦至三綦皆天之大福神主邦國乂寧五穀豐稔  
遠夷內附之應祥符二年三月甲子三年十一月己亥  
親謁庚子王欽若上親祠太一宮七言十韻詩上和而  
賜之

至天禧元年十一月二十一日乙卯凡六  
臨幸或祈或謝  
天聖二年九月辛卯祠

太平興國靈仙觀

七年六月初舒州懷寧僧過民柯萼家詣萬歲山以杖  
於古松下得黥石上刻誌公記云趙號云云萼以石刻

來獻於是詔舒州修司命真君祠

內臣蔡政  
敏董役

總成六百

三十區號靈仙觀祥符三年閏二月戊午遣官葺之五

年閏十月丁丑名石曰神告帝統石作詩紀其符應又

作贊

興國鳳翔上清太平宮

國初有神降于盤屋民張守真家守真為道士即所居  
創北帝宮太宗嗣位真君降言有忠孝加福愛民治國  
之語詔於終南山下築宮凡二年宮成宮中有通明殿  
題曰上清太平宮如真君預言祀神之夕上望拜興國  
六年十一月壬戌封神為翊聖將軍祥符七年加號翊  
聖保德真君凡真君所降語帝命王欽若編為三卷九  
年十月己卯上之上作序名曰真君傳 五季之亂實  
開國祚有神降于岐用蕩彼妖孽佑我社稷實無疆惟

休故於其地為上清宮 咸平三年八月置殿奉太宗

聖容天聖二年六月建殿奉真宗聖容

皇帝文德殿酌獻

蘇

軾上清宮辭有妖兮虛下土精為星兮氣如虹衛帝命  
以下討建千仞之修鋒澤充塞於四海獨澹然其無功  
默清淨以無為時節狩於牛魁詣通明而黜陟光下燭  
於九陟五嶽為豆四溟為杯

淳化亳州太清宮 祥符奉元宮 明道宮

聖製碑

亳州瀨鄉老子宅唐天寶為太清宮淳化四年修至道  
六年八月功畢祥符六年七月丁巳宰臣王旦等請詔  
蹕近畿鳴鑾景亳天老練日太僕戒徒展禮奉祠為民  
祈福八月庚申朔詔來年春詣太清宮行朝謁之禮先  
於東京置壇迴日恭謝天地詔曰顧譙都之舊壤峙曲  
里之珍祠炎漢庶民薦芳  
馨而祇肅有唐繼  
孝奉寶綬而尊崇而於辛酉命趙安仁等定儀注庚午  
制奉上真元皇帝號曰太上老君混元上德皇帝戊寅  
詔奠獻用蒼璧辛巳詔備三獻九月癸丑丁謂等言寶



冊用玉匱金繩十一月甲午賜真源縣行宮名曰奉元

殿曰迎禧後亭曰觀妙七年正月壬寅上乘輦發京師

丙午至奉元宮慶雲五色七鶴翔殿上是夕上齋于迎

禧殿作奉元宮致齋五七言詩近臣畢和戊申服通天

絳袍於迎禧殿庭奉老君加號冊寶冊文曰聖母發祥於夢日宣尼興歎

於猶龍已酉奉天書升殿服衮冕行朝謁之禮復詣先天

觀元始殿廣靈宮玉皇殿洞霄宮先天太焚香再拜復至

太清宮覽靈井瑞檜轉仗奉元宮下制赦亳州升為集

慶軍改奉元宮曰明道宮奉安玉皇像庚戌次亳州城之西設朝真迴蹕樓迎車駕上駐輦觀樂上作恭謁禮畢仰觀祥瑞歌辛亥作朝謁禮畢瑞應歌賜近臣

子童子李淑奏頌以述盛禮召對便殿試詩賜出身

改亳州

州城西門曰朝真北門曰均禧門樓曰奉元均慶

二月辛酉上至自亳州甲子

作奉祀禮畢還京歌賜近臣三月丁酉丁謂等請以奉祀緣路聖製刻石分立于太清明道二宮洎亳州南京從之八月丁丑對輔臣於景福殿內出聖製朝謁太清

宮南京頌明道宮碑聖祖殿銘先天太后古老君真武

高辛伊尹微子留侯雙廟贊示之九年三月庚午明道

宮成總四百八十區

八年四月甲子命王旦撰明道宮記向敏中撰太清宮頌李迪為觀

妙亭記

大朝景亳燕武陽之上儀迎年執期格帝鴻

之純貺

七年十月甲子亳州言甘露降太清洞霄宮

檜栢九年五月癸丑王

旦上明道宮記詔褒答

唐李嗣真傳調露中章懷太

子作寶慶曲閣於太清觀

舊唐書大寶二年九月辛

酉譙郡紫微宮改為太清宮

至道上清宮 元祐上清儲祥宮

上清宮在朝陽門內端拱元年二月太宗取晉邸太祖  
所賜金帛建宮為民祈福命楊繼宏主其役至道元年  
正月丙辰宮成總千二百四十二區御書額金填字賜  
之車駕臨幸咸平五年二月二十三日天禧三年四  
月七日凡十二臨幸慶曆三年十一月丙寅火元豐二  
年二月始命道士王太初居宮之故地稍修復祠宇日  
者言宮之所在為國家子孫之祥乃賜名上清儲祥刻  
玉印賜太初元祐四年春宣仁后重建六年秋成為大

殿三小殿九鍾經樓二石壇一建齋殿於東築道館於

西凡七百餘間

六月詔蘇軾撰碑銘曰作宮千柱人初不知

八月名門曰景

霄殿曰紫極蕃釐九月十九日幸明道二年三月丁

亥祈雨上清宮政和初作上清寶籙宮西京亦有上

清宮在洛城北即唐開元中老子祠明皇謁廟詩石存

馬景德四年二月甲戌謁宮祥符四年三月壬午幸作

宮銘及五言詩示近臣

至道壽寧觀 皇祐神武觀

至道二年七月庚子新作壽寧觀成 神武觀舊有太祖御榻奉安聖容皇祐三年改名

咸平北京紫微宮

咸平三年正月十七日車駕駐北京幸大安寺紫微宮

祥符二年七月甲子詔太平州隱士趙自然精修養

之術召至闕下改青華觀名曰延禧 雲臺觀在華陰

華山下真宗再幸至和元年修建集真殿

治平四年九月張方平記

祥符洞真宮

端拱三年十二月以興道坊宣祖舊第為道館至道元年正月乙丑成凡二百六十五區祥符改今名

祥符天慶觀

祥符元年十一月詔以正月三日為天慶節四月朔為天祺節二年十月甲子詔州郡建天慶觀五年閏十月癸酉增設聖祖殿既又因事建節有天貺先天降聖之日與正至三元日皆有朝謁

劉氏為堯後孔穎達疑左氏為漢儒傳會唐乾封追

卷一百  
崇老君之號天寶名以聖祖館之新廟興慶太清之  
祠殫極鉅麗蓋世儒謂帝王之生皆出神明之裔鄭  
氏至謂帝王之始皆感天而生大抵推世德以崇帝  
胄神天命以弭奸覲此聖祖殿所為作也 景靈宮  
前殿奉聖祖用道家儀中後殿奉帝后行家人禮

淳熙八年八月一日御書平江府天慶觀三清殿曰金  
闕寥陽寶殿

祥符會真宮 太寧宮



元年孟冬辛亥園臺禮成壬戌禪社首詔泰山奉高宮  
改為會真宮增葺室宇二年十二月辛卯出聖製會真  
宮碑示王旦等三年二月丁未王旦準詔撰會真宮記  
上之三年十月庚戌賜寶鼎縣行宮名曰奉祇前殿曰  
穆清後亭曰延慶四年二月丁巳御大輦備鑾駕至奉  
祇宮戊午召輔臣登延慶亭亭在行宮後圃南望仙掌  
北瞰龍門是日上齋於穆清殿辛酉祠后土上乘輦至  
后土廟登鄒丘亭周覽汾河望梁山即日還奉祇宮鈞

容樂太常鼓吹振作詔改奉祇宮曰太寧宮設后土聖  
母像壬戌御朝覲壇受朝賀制曰稽漢史合荅之言述  
郊壤光靈之舊庶祈穀實用介民休咸秩四望躬薦貳  
觴黃瑞畢升柔靈叶應輯圭璧以朝羣后覽風俗而問  
百年四月己未詔睢上后土廟上額為太寧壬戌增葺  
宮廟五年七月癸未慶成軍太寧宮廟成總六百四十  
六區六年九月乙卯慶成軍言太寧廟御製碑閣生金  
芝二本會真太寧明道章聖三巡幸之行宮也

祥符玉清昭應宮 萬壽觀

元年四月丙午詔以蒼昊顧裏紫清孚石於京邑擇地  
建宮惟天波門外殿直班院吉二年四月己亥命丁謂  
為修宮使六月甲午臨幸觀七元閣式七月辛未賜宮  
名玉清昭應三年七月戊寅朔詣紫微殿焚薌已卯上  
梁四年十月幸觀玉皇殿上梁宴從臣作七言十韻詩  
命屬和五年王旦為使御製朝謁十一曲  
景祐二年製  
二曲仁宗  
六年十月御製步虛詞七年五月乙未丁謂請製碑頌

從之六月己未名天書閣曰寶符二聖殿閣曰集靈翊

聖閣曰凝命十月癸亥宮成前殿玉皇太初次聖祖明慶次

紫微二聖二星殿周伯壽星建閣上以奉天書次奉七元輔

弼星東以奉太祖太宗凡二十六百一十區著令郊祀

必薦獻甲子賜酺十一月癸未朔親書太初明慶二聖

殿寶符閣額填以金辛卯學士晁迥上頌八年四月以

兩朝聖文宸翰所藏為先猷繼文殿正月壬午朔備鸞

駕詣太初殿奉安天書於寶符閣還受賀于崇德殿凡六

幸十一月名北園曰奉真九年十月鑄金寶牌方土以鐵為金

上方鑄金龜金牌各數百龜以賜近臣人一枚天禧元年四月乙亥以金寶牌

分給在京宮觀及天下名山長二寸廣一寸餘又分置太初殿及

諸殿三年十一月皇后太子於宮東偏建長生殿賜名

長生崇壽帝作贊紀之四年五月癸酉奉安御書殿額

五年七月作本命殿于宮中名萬壽天聖元年十一月

奉真宗聖容琢玉石像安於集靈殿以安聖殿為名二

年七月癸丑奉安萬壽觀即宮之長生殿也有延聖

殿至和二年正月丁卯奉安真宗金像景祐元年九月十六日幸萬壽觀至寶元慶厯凡四幸至和元年十二月觀文大學士晏殊提舉萬壽觀政和七年建神霄玉清萬壽宮

祥符會靈觀 皇祐集禧觀 神藻殿

祥符五年壬子八月己未命丁謂等建觀南薰門外以奉五岳

先是四年五月十七日詔加上五岳帝號作奉神述又定冕服制度

七年九月壬

子名曰會靈門曰嘉應昭福殿曰延真崇元祝釐

先是九月

辛丑幸五岳觀十九日壬寅上梁命宰相宗室觀之八年四月丁謂請御製頌記

五月癸巳名池曰凝祥園曰奉靈八月壬辰幸十一月

丙辰迎御書殿額丁巳臨幸至天禧二年凡四臨幸宴從臣於祝

釐殿詣凝祥池觀醺殿作七年詩九年正月又幸丙辰以丁

謂為使五月丙辰觀成晏殊有賦云考甘泉之舊規跨集靈之遠迹五殿東天

齊仁聖南司天昭聖西金天順聖北安天元聖中中天崇聖車駕親謁一本又云五

獻景靈宮會靈觀二賦上嘉之遷太常丞六月戊寅車駕詣會靈觀酌獻宴從臣于祝禧殿復詣凝祥池上作

七言詩賜天禧三年二月王欽若上會靈志百卷詔名

近臣和

五岳廣聞記賜序冠篇天聖二年八月庚午幸燕從臣

於祝釐殿五年正月乙卯又幸

天聖九年十一月己丑祈雪于會靈觀明道二

年三月丁亥慶曆三年五月十四日庚辰皇祐五年正

月災尋重修六月丙戌成更名集禧

一本云會靈觀頌記及延真殿五岳

殿額並真宗御製御書皇祐五年正月戊午更名集禧六月成初即西偏建殿祠五岳

以真宗嘗製奉神述名曰奉神殿因命知制誥蔡襄重

摹真宗御書立石東廡名曰神藻殿令襄書殿扁

熙寧三年

閏十月二十三日詔神藻殿奉安真宗御容

又名靈應真君殿曰靈福命王



洙書扁至和元年六月二十三日名齋殿曰潔誠園曰

芳華

熙寧四年正月十四日丁未幸燕從官元豐元年正月十四日又幸

康定元年九

月戊午參政李若谷提舉會靈觀宮觀置提舉自若谷

始治平四年九月富弼為集禧觀使

後王安石薤頌

祥符景靈宮頌 元豐原廟

御書十一殿

祥符五年閏十月戊寅詔兗州曲阜縣為仙源縣壽丘

建道宮奉聖祖以景靈為名建道觀奉聖祖母以太極

為名

先是十月戊午對輔臣于滋福殿上曰二十四日聖祖臨降于延恩殿

十二日戊辰

寶錄同稽古錄

作十二月戊子

詔曰仙源啟祚鴻應非常爰經始於

密都俾詢求於吉壤聿申嚴奉式煥宏規惟文考在潛  
之居乃沖人載誕之地據神明之興處京邑之中諒氣  
象之殊尤宜真靈之降祐永惟欽翼庶保龐祺宜以錫  
慶院建景靈宮先是以聖祖降臨命丁謂等度地建宮  
及令禮官考制度以聞是月丁謂言司天少監王熙元  
等狀按晉天文志張南有天廟十四星乃帝王祖宗之  
廟也今大內法太微天廟星在太微南宜於大內東南

已丙位建新宮以合天廟之制仍請以錫慶院開封府  
建置故有是命丁謂為修宮使六年

闕

詳到

景靈宮畫圖請自今後每歲孟享

闕

天地社

稷同奏告即於北宮行禮從之

闕

宮地隘狹

欲展入恭孝太子魏王二院增建殿宇齋宮從之七年  
八月甲寅朔宰臣向敏中為景靈宮使甲子命參政丁  
謂為修宮使擢三司林特為副使藍繼宗為都監約唐  
太清宮制度十一月辛卯晁宗操上慶成歌八年十二

月真宗詣景靈觀上梁

一云八年正月丁酉興工

是歲七月丙辰詔

王欽若討閔道藏得趙氏神仙四十人事迹分畫廊廡

九年四月丙戌向敏中請御製景靈宮贊頌御書刻石

五月丙辰宮成羣臣詣崇德殿賀

一云祥符九年集賢校理晏殊獻景靈宮

會靈觀二賦上嘉之五月戊午特命遷秩

凡七百二十六區南開三門二重

正殿曰天興

五年作

琢玉石為聖祖像閣曰保寧閣以奉

元天后殿前東西門曰左右正元車路門曰昌福承禧

殿曰明福宮東門曰普通丙寅謁景靈宮天禧元年正

月丙辰謁景靈宮二月以宮成賜酺壬申御正陽門觀  
酺大合樂上作景靈宮成賜酺七言詩賜從臣 天聖  
元年三月詔修景靈宮萬壽殿奉安真宗神御以奉真  
為名二年三月成十一月乙未朝饗玉清昭應景靈宮  
丙申饗太廟丁酉祀天地于園丘五年七月庚申命學  
士承旨劉子儀撰景靈宮頌七年七月乙酉罷宮觀使  
明道二年景靈宮又建廣孝殿 治平元年九月詔名  
齋殿曰迎釐宮西門曰廣祐 元豐三年九月己卯薦

享乙酉詔景靈宮作十一殿以時祭之禮祀祖宗五年  
九月二十七日乙巳御崇政殿召宰輔侍從以上觀十  
一殿御書牓十一月辛巳四日百官班于集英殿門帝  
詣藥珠凝華等殿行告遷之禮壬午奉安神御于十一  
殿癸未朝獻六年正月九日詔四孟月詣宮朝獻四月  
四日行朝獻禮十一月南郊甲辰行朝獻之禮如太廟  
儀宮成羣臣獻歌頌者十數獨馬希孟之文可觀六年  
三月辛巳除太學博士七年四月十七日丙戌景靈宮

言芝草六生於天元殿景靈門中壬辰朝獻至天元殿

觀芝草

元祐元年九月己未朝饗景靈宮辛酉大饗明堂以神宗配

始大中祥

符以奉祠聖祖迨天聖初乃易其旁之萬壽殿曰

奉真以為真宗館御之所治平建仁宗之殿曰孝嚴

熙寧建英宗之殿曰英德而宣祖藝祖太宗之殿曰

慶基曰開先曰永隆母后之殿曰隆福重徽章德廣孝

皆寓於佛老之祠布在都邑與夫郊野之外

凡七十年神御在宮

者四其它寓諸寺觀者十一所

神宗元豐五年乃詔有司度宮之東而

建六殿為原廟奉祖宗像設以昭穆之次列之左右又為別殿五於其北以奉母后凡十殿宣祖曰天元藝祖曰

皇武太宗曰大定真宗曰熙文仁宗曰美成英宗曰治隆昭憲后曰太始孝明后曰儷極懿德明德元德后曰輝德章穆章獻章懿后曰衍慶慈聖后曰繼仁元祐

九年作徽音殿奉宣仁后紹聖二年作顯承殿奉神宗元符三年作西宮以顯承為館御之首易名大明又作坤元殿奉欽聖欽成欽慈后重光殿以奉哲宗政和四



年作柔儀殿以奉昭懷后

中興後昭  
慈殿名同

於是兩宮合為前

殿九後殿八山殿十六閣一鍾樓一碑樓四經閣一齋

殿三神厨二道院一凡二千三百二十區累朝執政節

度使以上並圖形於兩廡 宋祁景靈宮頌漢纂堯

後立唐山之祀而文獻不足李出柱下尊瀨鄉之

宇而獨恭不優 王子韶六聖原廟賦云覽洛邑

清廟之詩參魯頌閼宮之事原廟之作古矣而議

者祖叔孫通非也 周邦彥汴都賦會聖之宮是

為原廟其制則般輸所作其材則匠石所掄赫赫  
大宇有若山踊而嶙峋藻珠廣寒黃帝之宮榮光休氣  
籠矚往來蔥鬱而氤氲軒廡所繪功臣碩輔書太常而  
銘鼎彝者環列而趨造龍章鳳姿瑰形偉貌文有伊周  
武有方召其殿則有天元太始皇武儷極大定輝德熙  
文衍慶美成繼仁治隆之名十一  
殿名重瞳隆準天日炳明  
皇帝步送百僚拜迎九卿三公挾輶扶衡神既安止於  
是山罍房俎犧尊竹籩踐列於兩楹瞽叟陳辭宰祝行

牲登降裸獻百禮具成

祥符兗州景靈宮 太極觀

五年閏十月戊寅兗州壽丘建道宮奉聖祖名曰景靈

道觀奉聖祖母名曰太極九年四月己亥御書額賜王

旦等七言詩五月丙辰<sub>日</sub>十三宮成總十三百二十區羣

臣稱賀丁巳行告成之禮<sub>向敏中為慶成使制曰式瞻感電之區仍啟明霞之館</sub>

天禧二年五月戊寅宮之昭慶殿生金芝

祥符延祥觀

六年八月戊子詔泗州新造觀名延祥發願文閣  
名數文七年十一月辛卯修觀畢功 咸平元年  
賜忠州仙都宮太宗御書一百二十卷景德元年  
賜名景德觀 慶厯六年四月己未以延寧觀為  
延寧宮

祥符南京鴻慶宮 三聖殿

七年正月乙卯車駕次應天府丙辰升為南京詔曰  
陽興壤藝祖舊邦膺命厯以天飛創基圖而日盛朕將

躬朝渦水茂集蕃釐旋幸平臺緬懷積德想清都之錫  
類慶洪緒之無彊奉真像以顒昂建靈宮於曲密洪惟  
三聖敷佑萬方故當陪仙御於福建儼宸儀於恭館南

京新修聖祖殿宜號曰鴻慶宮仍奉安太祖太宗像

八月

丁丑遣都知閹承翰等奉  
像至歸德殿後正位權安

天聖元年二月修神御殿成

丁巳詔迎太祖太宗聖像奉安四年十月丙申又奉安

真宗御容康定元年六月火慶厯六年十二月詔重修

三聖御容殿七年六月辛亥命翰林學士張方平為禮

儀使南京七月癸未奉安三聖御容于鴻慶宮以南京  
太祖始基故也仁宗時令內侍王崇修殿劉攽作鴻慶宮三聖殿  
賦曰伯益始掌火而底績而宋以火帝興于火墟天之  
報施昭昭可推

天禧祥源觀 至和醴泉觀

天禧二年戊午閏四月丁未有泉湧于拱聖營真武廟  
甲寅即其地建祥源觀八月一日辛酉成凡三  
殿北崇真東聖總六百十三區至和元年四月辛丑火

殿西靈淵

重修二年十二月壬子成名曰醴泉

殿更名為感通寧聖涵清靈游鴻祐

崇觀 元祐元年三月十四日改慈壽殿為壽輝殿

天聖二年八月庚午明道

二年十二月八日幸祥源觀慶厯五年二月辛亥祈雨

祥源觀治平元年四月甲午祈雨醴泉觀熙寧四年九

月丁未幸醴泉觀 祥源觀使乾興元年七月錢惟演

為之天聖七年七月宰臣夷簡等請罷宮觀使詔可皇

祐元年四月乙酉賈昌朝為祥源觀使元祐八年六月

資政梁燾為同醴泉觀使

使非宰相不除故置此名

天禧崇福宮

在嵩山下古太一觀也天禧三年重建五月己巳賜名  
太一殿曰祈真三尊殿曰會元 又有保祥殿奉真宗  
像 大觀元年詔洛師修宮楹而大之三年三月成御  
製記

天聖西太一宮

天聖六年

戊辰

三月司天言雍熙甲申及今四十五年

太一行次入蜀郡之坤宮曰黃庭宮

戊辰歲五福自黃室趨蜀分

宜



於國城西南別建宮士戍詔於順天門外八角鎮後建  
西太一宮奉安十神九月辛丑成中三門曰顯真大殿  
曰黃庭後殿曰寧禧東西殿曰延貺資佑齋殿曰清修

癸卯

十二日

臨幸祠十一月甲寅宰臣張士遜為奉安使

丁巳以黃麾杖自禁中迎神像奉安命學士宋綬為之

記十二月癸亥九年九月癸亥臨幸慶曆三年三月親

謁禱雨四月往謝

恐即是七年之事紀亦不載

還幸別院賜名洞華

觀七年三月辛丑幸禱雨却盖不御及還而雨四月丁

未往謝壬子御正殿復常膳嘉祐七年三月乙丑祈雨  
庚午謝雨 宋祁作太一新宮頌

天聖西京會聖宮

八年

庚申歲

正月辛巳詔內臣張懷恩於永安縣訾王山

上建三聖宮

漢原廟之制

九年二月宮成甲辰以為會聖宮

三月甲寅奉安三聖御容改訾王山為鳳臺山

會要閏十一月

十五日宮成遣三司使晏殊迎三聖畫像奉安

留守推官歐陽脩采西人望幸

之意作頌序曰陛下即位十年因陵園起宮室以望神

游土木之功嚴而不華地爽而潔宇敞而邃神靈杳冥  
如來如宅非天子臨幸不能來三后之靈頌曰殿兮耽  
耽黼帷襜襜天威可瞻庭兮殖殖鉤盾虎戟容衛以飭  
太祖維祖太宗維弟真宗維子聖兮在天風馬雲車其  
來僊僊聖會于此靈威神馭其風肅然 熙寧二年五  
月二十二日丁亥奉安仁英御容

景祐廣聖宮

天聖二年建長寧宮以奉三清玉皇像後安真宗御容

於宮之降真閣景祐二年正月己酉改今名宮在禁中

古宮城之

西北隅

### 景祐延寧觀

三年七月己卯新作延寧觀

本王中正舊第在保康門內保慶太后於其地而建

之

### 嘉祐崇先觀

先是上清宮火壽星殿獨存遂建為壽星觀命起永崇殿嘉祐六年十一月成七年八月丁亥奉安真宗御容

帝親酌獻九月戊辰詔改觀名

會要六年十月癸亥以壽星觀真宗神御殿為

永崇殿 司馬光等諫以為祀豐于昵

熙寧中太一宮 政和北太一宮

詳見宮類

熙寧四年十月司天冬官正周琮言據太一經推算得熙寧七年甲寅歲太一陽九百六之數至是年復元之初故經言太歲有陽九之災太一有百六之厄皆在入元之終或元之初主有災厄然而陽九百六當癸丑甲寅之歲為災厄之會緣却得五福太一移入中都行臨

真室可以消異為祥竊詳五福太一自國朝雍熙元年  
甲申歲入東南巽宮故修東太一宮于蕪村天聖七年  
己巳歲五福太一入西南坤位故修西太一宮于八角  
鎮伏望詳稽故事崇建宮宇迎五福太一于京師上省  
其奏十一月丁亥乃詔將作匠於集禧觀東相視建宮  
六年癸丑春宮成會要四月十七日成凡七殿上親製名以十月  
二十五日迎奉太一神像熙寧四年司天監言五福  
太一之神以七年閏逢攝提格之歲行臨中宮其名為

真室其分為京師之野其祥為民康物阜太平之應請  
立祠詔將作監即國之南而建宮焉經始於四年十一  
月丁亥之冬而成於六年之春凡為三門七殿分祠太  
一與天一之神而五福居中上為製名皆以承神之休  
為義而真室之殿又於廊廡四壁圖百神之朝天至於  
五帝日月星辰地至於五岳四瀆莫不咸在其位號尊  
卑服物同異與夫壇場之制禱祠之儀皆以太一之學  
為本而參用道家之說焉天子命有司具儀仗將以今

年冬至奉安神像於其宮 太一星在紫宮太一之南

以為天帝神主使十六相知其休咎所在之國北辰第

二星最赤明者乃其座也

漢志謂中宮天極其一明者太一之常居晉志謂北極第

二星明赤者是太一之座

而三台為天階太一躡之以上下而五福

之神凡四十五年一徙宮歷中宮四維大約二百二十

五年而一周在太平興國時臨黃室宮其分野為吳越

而太宗立祠於東南蘓村東太一宮是也在天聖時臨

黃庭宮其分野為梁蜀而仁宗始立廟於西南郊宜秋



門外八角鎮西太一宮是也自天聖五年至熙寧五年

壬子四十五年五福太一行基自黃庭宮移入真室之

中下移京都後神宗立中太一宮於五岳觀之舊址殿

名膺慶承釐與歲德民基相直 政和八年

即重和元年時未改

元著雍閏茂之歲太一臨乾維建北太一宮於龍德宮

後龍潛舊邸也

直都城之西北隅

照臨之方也

前殿曰黃秘次曰

統元神貺殿門曰黃秘之門

東設秘殿奉神霄

仲冬上辛藏事

詳見宮類

元絳詩揭題霏睿筆移御練剛辰卜用張衡舊

方從薄忌新九歌鏡吹合萬騎羽旄陳美光騰沛裔卿  
靄動輪囷甘泉宮殿函黃瑞中極星辰動紫微中  
太一宮使元祐六年正月馮京以觀文侍讀為中太一  
宮使非前宰相除使自京始

熙寧表忠觀

蘇軾作碑

元符景靈西宮

元符三年徽宗即位八月建景靈西宮

度馳道之西  
東直大定奉

神宗於顯承殿為館御之首建哲宗神御殿於西以東  
偏為齋殿從韓忠彥之言也靖國元年九月改顯承殿  
為大明北有殿曰欽儀以奉母后西則為重光殿以奉  
哲廟後又改欽儀為坤元崇寧元年四月十二日御製御書景靈  
西宮讚二十一日宰臣進頌凡為屋六百四十區經始  
於元符三年十月甲子不踰歲而成涓日遷奉親祠永  
為不祧之廟

宣和顯烈宮

大觀元年九月七日詔藝祖勦業自陳橋其地今為傳  
舍可即建觀賜名顯烈宣和六年三月二十一日成凡  
二百三十二間命李邴撰記

紹興景靈宮

紹興十年六月高世則為景靈宮使判温州奉神御十

三年二月乙酉建宮

新莊橋之西以劉光世賜第為之  
築三殿聖祖居前宣祖至徽宗居

中昭憲而下二  
十一后居後

五月七日進圖七月癸酉

一云  
己未

太常定

四孟酌獻儀九月乙未奉安列聖神御庚子行款謁禮

十一月戊午朝獻已未親享太廟庚申祀園丘十二月

甲午恭謝乙未再詣十八年五月十六日建景靈宮道

院於太一宮齋殿後地二十一年九月丁未增築

用韓世忠

賜第為之前殿五楹中殿七楹後殿十七楹齋殿進食殿皆

備暮年而畢

崇禋館道院在宮之南

掌宮內侍

承

元殿

徽

順承

顯恭顯

肅顯仁

端慶

欽

緒德

仁懷

皇德

高

章順

憲節

憲聖

系隆孝嗣徽

成穆恭肅

美明

光

光順

慈懿

垂光

寧

體德

恭淑

章

熙

理宗

紹興太一宮 瓊音樓

十七年十月十三日癸卯禮官討論太一典故詔修建

太一宮

先是權宜奉祀於錢湖門外惠照僧舍

二十八日進呈地圖上曰

建宮以昭事神之意不可崇飾華侈

宮在新莊橋之南

十一月

十四日有司請就宮建本命殿祝聖壽

一云壬辰建宮一云十二月癸

卯十八年二月宮成總一百七十四區

一云一百七十楹

凡六

殿二室兩廊殿門曰崇真大殿曰靈休挾殿曰瓊章寶

室本命殿曰介福崇禧

隆興元年二月十四日建本命殿名崇禧

並御書三

清殿曰金闕寥陽火德殿曰明離齋殿曰齋明皆御書

兩廡畫三皇五帝十一曜至里域真官像一百九十五

祀以四立日十九日奉安三十一日行親謁之禮

一云三月

庚辰初詣太一宮

十神曰五福君棊大遊小遊天一地一四神

臣棊民棊直符三月辛巳許士民焚薌十九年十二月

十六日甲子恭謝乾道八年三月九日以舊齋殿建北

斗殿淳熙十年十月七日御書藏額曰瓊章寶藏十三

年五月九日御書瓊音之樓賜道館

崇真館道院在宮之南

嘉定

初日官奏太一臨吳分有司請舉舊典上止命近臣以  
冬至祭告而不改作宮宇肇建太一尊有卜神毫忌  
啟奉祠之方天官著常居之記藜杖流光鏐旗斂影  
本命殿介福高崇禧孝崇福光順慶寧垂慶恭聖仁  
延禧理嘉熙元年改膺慶

紹興延祥觀 乾道天申萬壽宮

在西湖孤山舊名四聖堂紹興十四年六月慈寧殿用

工興建

以奉四聖真君

十五年十二月奉安神像二十年四月



一日賜名延祥 乾道三年五月二十三日詔台州天台赤城山玉京觀改為天申萬壽宮其後詔別擇勝地以常州宜興洞靈觀改焉

### 紹興萬壽觀

七年趙鼎除萬壽觀使兼侍讀十七年建萬壽觀於新莊橋之西以奉皇帝本命星官二十六年六月丁亥始建本命殿依在京名曰純福三十二年八月朔晨華館道院於東 祈年立泰望仙表漢

紹興顯應觀

高宗北使至磁而還孝皇母夢崔府君擁一羊遂生紹興十八年建顯應觀於臨安城南包家山

一云龍山

以奉磁

州崔府君二十二年十一月詔徙於靈芝寺之右

一云二十

四年

神羊告符絳輝貫室

紹興寧壽觀

臨安七寶山三茅堂有徽宗御畫茅君像紹興二十年

一云十六年

六月二十七日賜名寧壽觀

紹興旌忠觀

元年十月宣撫使張浚奏吳玠出兵陝西祈三聖顯應  
乞於鳳翔府和尚原立旌忠廟三年張浚等於臨安立  
廟十九年改賜觀額三十二年八月二十二日徙于  
覺苑寺故基 江州廬山有太平興國宮建殿奉

高皇本命紹興二十八年十二月丁亥朔賜名申  
福殿 台州崇道觀白雲庵乾道四年五月二十  
六日賜名白雲昌壽觀其後建本命殿賜名洪慶

殿

淳熙璇璣觀

淳熙二年太一宮敕璇璣觀以奉北斗十二月二十六日鑄印維北有斗象垂太微運平四時斟酌元氣斗有環域天之三辰

淳熙佑聖觀

三年以舊邸建佑聖觀十二月成壁間有上所題杜詩十四字六年二月己丑臨幸御講堂乃潛邸講讀之地

皇太子從

寶祐西太一宮

寶祐元年十一月十七日壬辰奉安殿曰黃庭門曰  
景福二年九月詔以十月三日詣宮黃庭殿行款謁  
禮為國祈祥禮文務從簡約二十六日詔別擇日

逆釐三神 增宮嶮差 大厦雲富重階波馳 延

喬松於東序詔韓岐於西廂 仙都殊庭清穆敞開

列仙之儒偃佺之倫迎神頌祇於其側 璇題

金鋪 乘飈駕歟 出日入月控鶴轡龍 瑤英

翠氣曼衍豐融 閔宇崇崇 神應豐融 金榜

瑤壇 羽節凌風珠珮珊珊碧樓三襲上接虹蜺

絳闕九成下交星雨 跨億齡而超萬祀 金碧

琅琳之居 祈年立泰望仙表漢 賓友松喬

玉霄琳房 鑣宮授籙豐戶收祥 運璿極而正

乾坤 坐開陽而調風雨 披道接靈之府含華

蘊粹之仙 山棲白鶴關度青牛 經之殖殖成

之翼翼綴日月以為光籠雲霞以為色 閔靈篇於綺  
閣儼睟像於琳房 法紫宙之宏規 作宮千柱人初  
不知於皇祖宗在帝左右風馬雲車從帝來狩 棟宇  
膠葛薨桷飛騫棲金浮翠蔚跂端嶮遠而望之祥烟佳  
氣若與慶霄連接上下 庶工雲集不日而成棟宇  
與金碧神麗雕珎盤礎鏤檀竦葉碧瓦鱗差瑤階肪截  
閣凝瑞霧樓橫祥霓百神守護諸真班列鳳歌諧律鶴  
舞會節宮成之日民大和會鼓舞謳歌聲聞于天大地

喜答神祇來格祝史無求福祿自至時萬時億永作神  
主 繡黼周張神光睟穆 星伯振鷺仙翁立鵠昌明  
侍几眉連捧燹 靈颺聖日 瑤宮碧簡絢采垂文

金繩玉簡龍駕霓裳 睟容端章黼坐儼赫金史玉  
童拱立擎侍如乘颺風羽輪覲紫皇于瓊宮 金篆玉  
扃銀宮瑤殿 王喬飛鳥神女窺窻 星柱雲楣 崑  
山之玉樓蒼海之銀宮 澤被翔泳慶溢烟霄 宅彌  
萬里廝征伯儔而役羨門 祝融警蹕而蹕御 貫列缺之



倒景象泰壹之威神 擬北極之嶙嶙列宿施於上榮 炕  
浮柱之飛棖 礪礪承陞琅玕絳檻坤靈顛顛以負砌天祇  
儼雅而翔戶 崆峒之請瑤池之燕 以清靜源治化以仁  
壽域生靈 像設崇巖殿宇沈邃 梅梁桂棟曲檻叢楹烟  
霞舒卷風露淒清仙官就位羽客來庭 流霞之庭明霞  
之宅 玉芟雲囊之術龍絨鳳蘊之圖 幸集靈之宮游  
祈年之館 福庭霞煥仙徒霧聚 傳赤字於東華受青  
符於南極 法大壯之上棟憲斯干之南戶 祕殿則崔


鬼博敞鬱律鴻紛翠蚪齊首以負棟海鷗囊尾而銜瓦玉  
鳥重荷大溜四注陽宗倒光以納景陰祇蒙霧而扶傾屏  
塵不游螟風無隧乃有皇邸五色黼帷九張為之真寢乃  
有雲梢三素綠輿八景儲乎仙衛其左右則飛宇回帶  
修廊班屬雲窠百層芝栢萬狀藻扃連觀抗為重門植  
松隱桂表其馳道揭示篆銀之榜列坐鑄錄之狄九層  
之臺五城之樓榮暴倭倭袂把浮丘水土和氣之寶玉  
帛二精之虔吐毛紛旅洄潦溥漑仙漿揖斗香雲薄霄像

以鸞輅龍駒器以鉤金華蓋瑞祝發中而臨遣使者持  
節以侍祠靈琫絳幡導乎謁款則盥而不薦稽大易之  
象坐工合樂陪乎夜誦則昏祠至明采甘泉之制高真  
並享卒福如儀飛龍秋游以格思盼蠻興作而歸福

敬集靈之庭 屹壇奠筭 藥笈真籍按循醺式草樓  
上士奉承薰濯沃酒茅以示潔默牲饗而撒腥 鎮神  
華以作固舉裨海而蒙祉 鼓舞至妙神合無垠以億  
上帝庇生民 可以震珍見怪者罔不祈可以蒙嘉獲

豐者罔不序 蒼水前戒紫宙博臨瑜然象載之美飄  
如風馬之下嘉夜四馥順拜睟清之容流霞載斟躬聞  
聲臭之載 宛延鴻紛上軼倒景觀深神麗仰法太微  
采詩供神夜之誦持節候神人之來惟清靜之庭以  
觀其妙不攜貳之爽以為之宗蠲烝上神申固百祿  
倚雲筑而流睿唱泚壺墨而霏仙翰 扈神壇謹馨菜  
度九筵之堂枚枚有恤瞻八景之馭飄飄下臻聯壓神  
臯之輿區震顯舊邦之新命 絕瑞日昭繁祺山擁

道陰孔彰颺游下翔 仰觀星定大度瑰宮 炳丹激  
射飛仙圖寫遽軒拖虹回阿舞馬 壇廟周張瓊縻迪  
嘗雲旄芬植罷案凝鏘 媧天鏤石奎畫摹星 歛若  
經閭風而歷琳房飄如排吉雲而挹丹露 白蜺擁蓋  
青虬夾轂 玉版彭觥 西龜定錄東華校名 珠巾  
琳几 明霞之館羽景之堂



玉海卷一百

欽定四庫全書

子部  
玉海卷一百一

詳校官中書臣張經田

主事臣祁韻士覆勘

總校官進士臣朱鈐

校對官中書臣方維甸

謄錄監生臣鄧肇槐

欽定四庫全書

玉海卷一百一

宋 王應麟 撰

郊祀

祠壇

古者祀天地日月神示及即位慶賀建拜皆有壇場  
以行事誠之至禮之盡也

黃帝封祭壇



管子地數篇黃帝問於伯高曰吾欲陶天下以為一家為之有道乎伯高對曰上有丹沙者下有黃金上有慈石者下有銅金上有陵石者下有鉛錫赤銅上有赭者下有鐵此山之見榮者也苟山之見其榮者君謹封而祭之距封十里而為一壇使乘者下行行者趨修教十年而菑廬之山發而出水金從之蚩尤受而制之以為劍鎧矛戟雍狐之山發而出水金從之蚩尤受而制之以為雍狐之戟芮戈

黃帝園丘

漢武紀元封二年六月賜雲陽都百戶牛酒注晉灼曰  
雲陽甘泉黃帝以來祭天園丘處師古曰縣之所居在  
宮側者稱都

堯河洛壇

龍馬圖

文選赭白馬賦注尚書中候曰帝堯即政七十載修壇河  
洛仲月辛日禮備至于日稷榮光出河龍馬銜甲赤文  
綠色臨壇吐甲圖 宋符瑞志湯乃東至于洛觀帝堯

之壇沈璧舜設壇于河依堯故事至于下昃榮光休氣  
至黃龍負圖出于壇畔赤文綠錯成王少周公攝政七  
年與成王觀于河洛沈璧禮畢候至日昧榮光出青雲  
浮青龍臨壇銜圖玄龜止壇赤文成字 庾信堯登壇  
銘曰登壇洛汭沈玉河湄丹圖馭馬綠甲乘龜榮光上  
幕休氣連帷

周園丘方丘

見上類

泰壇

郊特牲疏王肅以郊丘是一而鄭氏以為二聖證論王

肅難鄭云祭法說禘無圓丘之名周官圓丘不名為禘  
是禘非圓丘之祭也詩思文后稷配天之頌無帝嚳配  
圓丘之文知郊則圓丘圓丘則郊所在言之則謂之郊  
所祭言之則謂之圓丘於郊築泰壇象圓丘之形以丘  
言之本諸天地之性故祭法云燔柴於泰壇則圓丘也  
郊特牲云周之始郊日以至周禮云冬至祭天於圓丘  
知圓丘與郊是一也 大司樂疏土之高曰丘取自然  
之丘圜者象天圜因高以事天故於地上因下以事地

故於澤中水鍾曰澤取自然之丘方象地方郊之祭以  
后稷配園丘禘以鬯配祭法云禘黃帝之等皆據祭天  
於園丘禮天必於冬至地必於夏至之日者天陽地陰  
於陽生陰生之日祭之也郊天必於建寅者郊所感帝  
以祈穀實取三陽爻生之日萬物出地之時祭神州於  
北郊亦應取三陰爻生之月萬物秀實之時也 祭法  
疏張融以禘為五年大祭又以園丘即南郊與王肅同  
燔柴於泰壇瘞埋於泰折疏曰此祭感生之帝於南

郊神州地祇於北郊也禮器云至敬不壇此謂燔柴在壇設饌在地家語兆丘於南注謂圜丘之兆於南郊圜丘人之所造故謂之泰壇掃地而祭注圜丘之地掃焉而祭既至泰壇王脫裘矣服袞以臨燔柴春官凡以神仕者注祭天圜丘象北極祭地方澤象后妃春秋繁露春秋之法王者歲一祭天於郊四祭於宗廟漢志王商等以為兆於南郊所以定天位也祭地於大折在北郊就陰位也郊處各在聖王所都之南北折杜

鄴曰古者壇場有常處燎裡有常用贊見有常禮犧牲  
玉帛雖備而財不匱車輿臣役雖動而用不勞每舉其  
禮助者歡說大路所歷黎元不知

周朝日夕月壇

見上類

周合諸侯壇 方明壇

禮司儀掌九儀之賓客擯相之禮將合諸侯則令為壇  
三成宮旁一門注天子春帥諸侯拜日於東郊則為壇

於國東夏禮日於南郊則為壇於國南秋禮山川丘陵  
於西郊則為壇於國西冬禮日月四瀆於北郊則為壇  
於國北既拜禮而還加方明於壇上而祀焉所以教尊  
尊也覲禮曰諸侯覲於天子為官方三百步四門壇十  
二尋深四尺是也 司盟詔明神注神之明察者謂日  
月山川覲禮加方明于壇上所以依之 左傳子產曰  
大適小有五美作壇以昭其功宣告後人無怠於德  
南史陳大建十年九月乙巳立方明壇于婁湖甲寅臨



誓衆

魯雩壇

春秋大雩

書凡二十

左傳桓五年秋大雩書不時也凡

祀啟蟄而郊

夏正建寅之月祀天南郊

龍見而雩

建巳之月蒼龍宿之體昏見東方祭

天祈膏雨

始殺而嘗

建酉之月

閉蟄而烝

建亥之月

過則書正義天官

東方之星盡為蒼龍之宿雩之言遠也遠為百穀祈膏

雨豫為秋收意深遠也諸侯雩山川魯得雩上帝故稱

大公羊傳大雩旱祭也注君親之南郊以六事謝過

自責童男女各八人舞而呼雩 穀梁傳雩者為旱求

者也求者請也注其禱辭曰方今大旱野無生稼寡人  
當死百姓何謗不敢煩民請命願撫萬民以身塞無狀

注又云傳例曰雩得  
雨曰雩不得雨曰旱

疏天子雩上帝諸侯雩上公魯與

天子同雩上帝上帝既雩雩及百辟卿士有益於民者

考異郵說僖公三時不雨禱于山川以六過自責云云

案春秋考異郵三時唯有禱禮無雩祭之事唯四月龍

星見始有常雩 月令大雩帝云云正義凡正雩在周

之六月常事不書書秋大雩傳不云旱者皆過雩也傳  
言旱者皆為旱脩雩也雩書月者為脩旱雩得禮故定  
元年穀梁傳曰雩月雩之正也秋大雩非正也僖公三  
時不雨帥羣臣禱山川以六過自責凡雩必先禱 祭

法雩宗祭水旱也

宗當作崇

疏亦壇名也雩吁嗟也崇為營

域而祭之詩雲漢云靡愛斯牲鄭注大祝云類造禮崇  
皆有牲攻說用幣而已 論語樊遲從遊於舞雩之下

左傳莊十年雩門注魯南城門 水經注南門亦曰

雩門門南隔水有雩壇壇高三丈曾點所欲風舞處也  
郊特牲疏鄭注論語云沂水在魯城南雩壇在其上  
史記正義括地志云沂水亦名雩水衛宏漢舊儀云  
魯雩壇在城東南引龜山水為沂至壇西行曰雩水

南齊志鄭玄云雩壇在南郊壇之旁而不辨東西論

衡重仲舒雩祭之法設土龍以為感

劉子駿掌雩  
祭典土龍事

漢

昭帝紀始元六年夏旱大雩不得舉火注抑陽助陰也

### 漢大將壇

高紀元年夏四月漢王既至南鄭韓信為治粟都尉亡

去蕭何追還之薦於漢王王齋戒設壇場拜信為大將

軍

傳云以為大將蕭何曰王必欲拜之擇日齋戒設壇場具禮乃可王許之張良傳漢王之將獨韓信可

屬大事

當一面 九域志興元府有韓信壇

### 漢高祖即位壇

高紀五年二月甲午漢王即皇帝位于汜水之陽注張

晏曰汜水在濟陰史記正義括地志云高祖即位壇

在曹州濟陰縣界

漢五帝壇 泰一壇 紫壇 甘泉園丘 泰  
畤壇

見郊祀類

漢嘉壇

志郊祀歌后皇十四后皇嘉壇立玄黃服五神十六  
嘉壇椒蘭芳

漢壽福壇

洞冥記元光元年起壽福靈壇闊百步四周起銅梁銀

堤

漢高邑即位壇

光武紀建武元年

旃蒙作  
丑歲

四月行至鄆命有司設壇場

於鄆南千秋亭五成陌

注壇築土場除地其地在今趙  
州栢鄉縣水經注曰亭有石壇

壇有圭頭碑其陰云常山相馮龍所造  
壇廟之東有兩石翁仲南北相對焉

六月己未即皇

帝位燔燎告天裡六宗望羣神其祝文曰云云建元大

赦改鄆為高邑

祭祀志建武元年光武即位于鄆為

壇營於鄆之陽祭告天地采用元始中郊祭故事六宗

羣神皆從未以祖配天地共犢餘牲尚約 郡國志常  
山國高邑故鄣光武更有千秋亭五成陌光武即位  
於此 肅宗紀元和三年三月丙子詔高邑令祠光武  
即位壇 金石錄光武即位壇碑唐開元二十二年四  
月王預撰

漢社稷方壇

詳見前類

祭祀志建武二年立太社稷于雒陽在宗廟之右方壇  
無屋有牆門而已



漢先虞壇

祭祀志立秋之日迎秋于西郊祭白帝尊收

月令章句曰西郊九

里因金數也

車旗服色皆白歌西皓八佾舞育命之舞使謁

者以一特牲先祭先虞于壇有事天子入圓射牲以祭

宗廟名曰軀劉 禮儀志立秋之日白郊禮畢始揚威

武斬牲於郊東門以薦陵廟其儀乘輿御戎路白馬朱

鬣躬執弩射牲牲以鹿麋

月令曰天子乃厲飾執弓挾矢以獵月令章句曰親執弓

以射禽所以教兆民載戰事也四時閑習以救無辜以伐有罪所以強兵保民安不忘危也

太宰令

謁者各一人載獲車馳駟送陵廟還宮遣使者齎束帛

以賜武官

漢官名秩曰賜太尉將軍各六十匹執金吾諸校尉各三十匹武官倍於文官

武官

肄兵習戰陣之儀斬牲之禮名曰驅劉兵官皆肄孫吳

兵法六十四陣名曰乘之

月令孟冬天子講武習射御角力盧植注曰角力如漢家

乘之引闕踴躍之屬今月令季秋天子乃教田獵以習五戎月令章句曰寄戎事之教於田獵武事不可空設必有戒故寄教於田獵開肄五兵天子諸侯無事而不田為不敬田不以禮為暴天物周禮司馬以旗致民平列陣如戰之陣王執路鼓諸侯執賁鼓軍將執晉鼓師帥執提旅帥執鼙卒長執鏡兩司馬執鐸公司馬執鐃以教坐作進退疾徐疏數之節士卒聽聲視旗隨而前却故曰師之耳目在吾旗鼓春教振旅以蒐田夏教蒐

舍以苗田秋教治兵以獮田冬教大閱以狩田春夏示  
行禮取禽供事而已秋者殺時田獵之正其禮盛獨斷  
曰巡狩獵還公卿以下陳雉陽都亭前街上乘輿到公  
卿以下拜天子下車公卿識顏色然後還宮古語曰在  
車為下唯  
立春遣使齋束帛以賜文官

漢官名秋曰賜  
司徒司空帛四

十匹九卿十五匹古今注曰建武  
八年立春賜公十五匹卿十匹  
獮劉之禮祠先虞執

事告先虞已烹鮮時有司乃逡巡射牲獲車畢有司告

事畢

古今注曰永平元年六月乙卯初令百官獮腰白  
幕皆霜風俗通稱韓子書山居谷汲者腰臘而真

水楚俗常以十二月祭飲食  
也又曰當新始殺食曰獮腰

漢雒陽圓壇 北郊方壇

見郊兆

漢雩場

鍾離意傳永平二年夏旱而大起北宮意上疏帝策詔  
報曰湯引六事咎在一人比上天降旱密雲數會朕戚  
然慙懼思獲嘉應故分布禱請闕候風雲北祈明堂南  
設雩場

注明堂在洛陽城南言北禱者蓋時修雩場在明堂之南

又勅大匠止作諸

宮減省不急詔因謝公卿百僚遂應時雨 紀安

帝永初七年五月庚子京師大雩順帝陽嘉元年

二月戊辰雩甲戌詔曰分禱祈請靡神不崇 通典後  
漢行雩禮以求雨閉諸陽衣皐興土龍立土人舞僮二  
佾七日一變朱索縈社伐朱鼓禱以少牢 禮儀志同 魏太  
和五年三月辛巳大雩

漢泰山祠壇

章紀元和二年二月辛未幸太山柴告岱宗有黃鵠三  
十從西南來經祠壇上東北過于宮屋翱翔升降

魏園丘 方丘

魏志景初元年冬十月乙卯營洛陽南委粟山為圜丘

注詔曰號圜丘曰皇皇帝天方丘所祭曰皇皇后地天

郊所祭曰皇天之神地郊所祭曰皇地之祇

至晉泰始二年并圜

丘方丘二至之祀於南北郊

十二月士子冬至始祀

續漢志注雒

陽魏氏春秋曰有委粟山在陰鄉魏時營為圜丘魏

志注魏略曰正始中有詔議圜丘普延學士時郎官及

司徒領吏二萬餘人雖復分布見在京師者尚且萬人

而應書與議者略無幾人又是時朝堂公卿以下四百

餘人其能操筆者未有十人

晉先蠶壇

見親蠶類

晉雩壇

南齊書何佟之議曰鄭玄云雩吁嗟求雨之祭也雩帝謂為壇南郊之旁祭五精之帝配以先帝也百辟卿士古者上公以下謂句龍后稷之類傳曰龍見而雩止當以四月晉永和中中丞啟雩制在國之南為壇祈上帝

百辟舞童八列六十四人歌雲漢詩皆以孟夏得雨報  
太牢勾芒等五神是五帝之佐依鄭玄說宜配食於庭  
雩壇方郊壇為輕理宜在左宜於郊壇之東營城之外  
築壇壇宜圓崇四尺徑四丈周圍十二丈而四階設五  
帝之位各於其方舞雩依晉朝之議使童子司馬彪禮  
志云雩祀著皂衣崇陰之義今祭服皆緇建武二年議通  
典晉穆帝永和中制雩壇於國南郊之旁依郊壇  
近遠祈上帝百辟旱則祈雨齊建武二年旱雩以



武帝配饗於雩壇 晉元帝大興元年六月旱帝  
親雩

宋先農壇

宋文帝元嘉二十一年春親耕立先農壇於藉田中阡  
西陌南高四尺方二丈為四出陛陛廣五尺外加埽去  
阡陌各二十丈 隋於國南十四里啟夏門外置地千  
畝為壇孟春吉亥祭先農於其上以后稷配牲用一太  
牢

梁南北郊壇

隋禮志梁南郊為圓壇在國之南高二丈七尺上徑十一丈下徑十八丈其外再墻四門常與北郊間歲正月上辛行事太史設柴壇於丙地齋於萬壽殿乘玉輅備大駕以行禮北郊為方壇於北郊上方十丈下方十二丈高一丈四面各有陛其外為墻再重何佟之議自晉太始二年并圓立方澤同於二郊今之郊裡禮兼祈報後周司量掌為壇之制圓立三成方立一成

梁雩壇

隋志梁制大雩禮立圓壇於南郊之左高及廣輪四丈周十二丈四陛舞童八列歌雲漢詩一章天監九年有事雩壇以為雨旣類陰求之正陽其謬已甚東方生養之始遂移於東郊大同五年又築於藉田北內有祈禱則齋官寄藉田省云後齊歌雲漢詩於壇南隋國南十

三里

詳見  
羣祀

後齊迎氣壇

隋志梁制迎氣以始祖配牲用特牛一其儀同南郊後齊五郊迎氣為壇各於四郊又為黃壇於耒地後周五郊壇其崇如其行之數廣四丈方百二十步內壇半之隋五時迎氣為壇各依其方

### 隋青帝壇

禮儀志開皇十四年羣臣請封禪十五年春行幸兗州次岱岳為壇如南郊又壇外為柴壇又陳樂設位於青帝壇如南郊服袞冕乘金輅備法駕行禮

隋先蠶壇

禮儀志隋制於宮北三里為壇高四尺季春上巳皇后服鞠衣乘重翟率三夫人九嬪內外命婦以太牢制幣祭先蠶於壇上用一獻禮

隋園丘

志高祖為園丘於國南太陽門外道東二里其丘四成各高八尺一寸下成廣二十丈再成廣十五丈又三成廣十丈四成廣五丈後魏太和十二年築園丘於南

郊

唐園丘 方丘 神州壇 五帝壇 朝日壇

夕月壇 社稷壇 蜡壇 燎壇 小祀壇

海瀆壇

禮志唐壇埴之數皆略依古四成而成高八尺一寸下成廣二十丈而五減之至于五丈而十有二陛者園丘也八觚三成成高四尺上廣十有六步設八陛上陛廣八尺中陛一丈下陛丈有二尺者方丘也高廣皆四丈

者神州之壇也其廣皆四丈而高八尺者青帝七尺者赤帝五尺者黃帝九尺者白帝六尺者黑帝之壇也廣四丈高八尺者朝日之壇也為坎深三尺縱廣四丈壇於中高一尺方廣四丈夕月之壇也廣五丈以五土為之者社稷壇也高尺廣丈蜡壇也高五尺周四十步先農先蠶壇也其高皆三尺廣皆丈者小祀壇也嶽鎮海瀆祭於其廟無廟則壇於坎廣一丈四向為陛者海瀆之壇也廣二丈五尺高三尺四出陛者古帝王之壇也

廣一丈高一丈二尺戶方六尺者六祀之燎壇也廣八尺高一尺戶方三尺者中祀之燎壇也廣五尺戶方二尺者小祀之燎壇也 賈餗園丘賦覆玉葉之卿雲昭扶桑之初日 韓愈元和聖德詩園壇帖妥

唐受瑞壇

地理志北都倉城中有受瑞壇高祖使元吉留守獲瑞石築壇祠以少牢

唐龍池壇 龍池樂章

又見樂類頌類



會要開元二年閏二月詔令祠龍池六月四日右拾遺

蔡孚獻龍池篇公卿以下百三十篇付太常寺考其詞

合音律者為龍池樂章共錄十首

姚元崇蔡孚沈佺期  
盧懷謹姜皎崔日用

蘇頌李乂姜晞裴  
淮十人等為樂章

十六年詔置壇及祠堂每仲春將祭

則奏之十八年十二月二十九日有龍見于興慶宮池

因祀而見也太常卿韋縉草祭儀請用二月云云二十

三年五月一日宗子請率月俸於興慶宮建龍池聖德

頌以紀符命望令皇太子書中書令張九齡為文從之

詳見興慶宮 通典祭興慶宮五龍壇大樂貞元六年  
令設判懸郊社令率齋郎設散搏五龍各二

六月復祭五龍壇

唐社稷壇

見社稷類

唐雩壇

通典開元十一年孟夏後旱則祈雨于雩壇

唐壽星壇

會要開元二十四年七月十二日庚子上封事者言月

令云八月日月會于壽星居次列宿之長請至八月社

日配壽星祠于太社壇

又請兩京各改一殿以萬壽為名千秋節會百僚於此殿勅

特立壽星壇以千秋節日脩其祠典二十六日甲辰勅

壽星壇宜祭老人星及角亢七宿著之常式舊紀開

元二十四年七月己巳初置壽星壇

八月庚戌老人星見

月令

八月有司秋分日享壽星于南郊

一本云明皇生于八月以仲秋日月會於

壽星特置壇用千秋節日祭老人星及角亢七宿著之常式

爾雅壽星角亢也注

列宿之長故曰壽星 漢元封二年郊雍還拜祝祠太

一贊饗曰壽星仍出淵耀光明

索隱曰老人星也

東漢仲秋

祀老人星廟 角亢與老人別星

唐青帝壇 九宮壇

詳見下

王璵傳玄宗廣脩祠祭璵請築壇東郊祀青帝肅宗乾

元元年入相乃奏置太一壇勸帝身見九宮祠

肅宗乾元二年

正月丁丑親祠九宮通鑑云戊寅祀九宮用王璵之言也 上元元年正月又祀九宮

會要開元二十五年十月一日

辛丑

制自今立春親迎

春於東郊二十六年正月八日親迎氣於東郊祀青帝

壇天寶五載十月十六日術士蘓嘉慶上言請於城東

置九宮神壇

招搖軒轅太陰天乙天符攝提咸池青龍太乙

唐風伯雨師壇

中祀

會要天寶四載七月二十七日勅風伯雨師濟時育物  
謂之小祀頗紊彝倫自今已後宜昇中祀仍令諸郡各  
置一壇九月十六日勅諸郡置風伯壇于社稷之東雨  
師壇于西其壇卑小於社壇造以立春後丑日祀風伯  
立夏後申日祭雨師五載四月十七日已亥詔祀雨師

以雷神同壇

上元元年停中祀小祀永泰二年復風師雨師貞元六年二月十七日復靈星等壇

貞元三年閏五月二十一日徙風師壇於澧水東國

史志立春後丑日祀風師壇高四尺東西四步三尺南  
北四步二尺皇祐定高三尺周三十三步立夏後申日  
祀雨師雷師壇高三尺方一丈九尺皇祐定周六步

祥符元年九月查道言外州風伯雨師令長吏親享二  
年三月澤州請建風伯雨師廟令禮官考儀頒下有司  
言唐制諸郡置風伯壇于社壇之東雨師壇于西各稍

北三數十步卑下於社壇無立廟之文

唐九宮壇 太一壇

紀天寶三載十二月癸丑祠九宮貴神于東郊

實錄十二月癸

已制曰九宮所主百神之貴上分天極下統坤維陰陽生靈功深亭育式昭新典肇建明祠以今月立春親祠

九宮壇癸丑親祠

會要天寶三載十月十六日術士蘓嘉慶

上言請於京城置九宮壇壇一成三尺四陞其上依位  
置小壇高尺五東南曰招搖正東曰軒轅東北曰太陰  
正南曰天一中央曰天符正北曰太一西南曰攝提正

西曰咸池西北曰青龍五數為中戴九履一左三右七  
二四為上六八為下符於遁甲十月十六日詔曰漢禱  
八神晉祠六宗惟九宮神實司水旱其令有司以來月  
甲子日立壇禮次昊天上帝壇而在太清宮太廟上用  
牲牢璧幣十二月二十四日親祀於東郊五載四月已  
亥制自今四孟月擇吉日祀天地九宮令宰臣行禮乾  
元二年正月丁丑通鑑上親祠至德三年即乾元六月  
戊寅九日置太一神壇於南郊東舊紀乾元元年六月己酉  
初置太一神壇於圓丘東



九宮以四孟隨歲改位行棊謂之飛位乾元後遂不易  
位太和三年崔龜從言九宮皆列星不容為大祀遂詔  
降為中祀會昌元年十二月令有司崇飾舊壇以宰相  
行事二年正月左僕射王起等奏案黃帝九宮經及蕭  
吉五行大義一宮其神太一星天逢卦坎行水方白二  
宮其神攝提星天内卦坤行土方黑三宮其神軒轅星  
天衝卦震行木方碧四宮其神招搖星天輔卦巽行木  
方綠五宮其神天符星天禽卦坤行土方黃六宮其神

青龍星天心卦乾行金方白七宮其神咸池星天柱卦  
兌行金方赤八宮其神太陰星天任卦艮行土方白九  
宮其神天一星天英卦離行火方紫統八卦運五行土  
飛于中數轉于極兩朝親祠而臻百祥幹造化於混茫  
賦品彙於陰陽與天地日月相參請復用大祀之禮祝  
版以社稷為準 國史禮志春秋二仲祀九宮貴神壇  
再成下高三尺五寸上高三尺三寸東西十步四尺景  
祐二年學士定司天監生奏案郊良遇九宮法有飛棊

立成圖每歲一移主九州災福事天寶中術士蘓嘉慶  
始置九宮神壇一成高三尺四陞上依位置九小壇東  
南曰招搖正東曰軒轅東北曰太陰正南曰天一中央  
曰天符正北曰太一西南曰攝提正西曰咸池西北曰  
青龍五數為中戴九履一左三右七二四為上六八為  
下符於遁甲此九宮定位也每歲祭以四孟位隨歲改  
謂之行棊自乾元後止依本位祭遂不飛易仍減冬夏  
二祭國朝因乾元故事皇祐增定壇如郊祀錄三成成

三尺四階上依位置小壇九皆高尺五寸縱廣八尺西

南為坤階

詳見後

咸平復為大祀景祐更定飛棊

皇祐二年

明堂分祀九宮用兩圭有邸

黃帝九宮經

隋志一卷又三卷

行棊經三卷

鄭玄注

房氏行棊法一卷九宮之說出於乾鑿度

漢黃香九宮賦伊黃靈之典度存文昌之會宮握璇璣而布政總四七而持綱和日月之光耀均節度以運行

## 唐太一壇

會要至德三年

即乾元元年

六月九日置太一神壇於南郊

東

中書侍郎王璵奏置舊紀云置於圓丘東通鑑云乾元元年六月己酉立太一壇

命璵祭之

元年

即上元二年是歲去年號

建丑月一日

辛亥

親拜南郊

一作祀圓丘

又祭太一壇非舊制也

### 唐先農壇

禮志永徽以前皆謂藉田壇至垂拱後乃為先農又因

韋叔夏張齊賢等議改為帝社壇元和二年

一作五年詔以

來歲正月藉田太常修撰韋公肅言藉田禮廢久矣有

司無所考乃據禮經參采開元乾元故事為先農壇於  
藉田高五尺廣五尺四出陞其色青舊紀大厯五年

四月丙午復置先農馬祖壇

命太常置

### 唐黃帝壇

會要天寶九載四月二十九日

一作十載四月辛巳

制曰頃者每

祀黃帝乃就南郊禮亦非便宜於皇城内西南坤地改  
置黃帝壇朕當親祀以昭誠敬

### 唐五龍壇

實錄貞元六年六月己酉復祭五龍壇初開元中每歲以二月祭之有司行事著於新禮自上元中元年閏四月己卯罷中小祀其祭遂廢及是宰臣請復之帝始以是日親祭 宋朝仲春祭五龍於堂廟在國門東

### 唐雩祀壇

實錄乾元二年三月

舊紀四月

癸亥以久旱徙東西二市於

是祭風伯雨師修雩祀壇為泥人土龍及望祭名山大川而祈雨 晉武咸寧二年春久旱四月丁巳詔廣加

祈請五月庚午始祈雨于社稷山川六月戊子獲雨此  
雩祭舊典也太康三年四月十年二月又如之 隋雩

壇國南十三里啟夏門外道左高一丈周百二十尺益

夏龍星見則雩五方上帝配以五人帝以太祖配饗五

官從配於下旱則祈雨

開皇二年四月甲申旱上親祀  
雨師於國城之西南癸巳上親

雩

成湯六事克己魯僖自責祈雨 禮有旱暵之舞

詩有昭回之詠

唐柴壇



宋朝元豐三年六月九日詳定奉祀禮文言後漢志郊祀既送神燔俎實於壇南已地晉賀循議積柴之壇宜於神壇南二十步丙地當太微明堂之位唐禮因之柴壇在園丘南內壝之外丙地

宋朝五帝壇

四郊迎氣及土王日記五方上帝以五人帝配五官三辰七宿從祀正月上辛祀感生帝乾德元年置感生帝壇興國八年十月五日記土德於黃帝壇圭幣牢具如

大祠淳化二年二月八日祕書監李至請祀青帝日去  
金提配坐嘉祐元年十二月九日詔祝文位版去五帝  
之名元豐六年八月改置白帝壇元祐九年正月重修  
黑帝壇齋宮紹聖四年閏二月八日徙白帝壇宮紹興  
三年四月十五日詔祀五方帝于四郊十八年升感生  
帝為大祀三十一年宗祀升五帝五人帝於堂用遵豆  
十二

乾德感生帝壇

乾德元年閏十二月乙亥

二十日

太常博士聶崇義上言

皇家以火德承正統請奉赤帝為感生帝

即五方上帝之一也以

每歲正月上辛別壇而祭下尚書省集議有司酌隋制

感生帝為壇南郊高七尺廣四丈奉宣祖配牲用騂犢

二玉用四圭幣如方色二年十一月二十五日禮官請

上辛從祀不設赤帝位熙寧五年四月三日詔以僖祖

配感生帝元豐四年十月禮官請用犢其後或祀於立

夏迎氣之壇大觀四年四月二十八日議禮局請於南

郊別立感生帝壇依赤帝高廣之制從之紹興十八年十一月一日祕書少監張杞言我朝火德題運世以僖祖配之祥符大觀或至親祠中興以為小祀宜升為大祀於是用羊豕各一於望祭齋宮行事升大祀 乾德元年撰八曲仁宗御撰二曲紹興十六曲

炎精之神飛輶碧落駕以浮雲丹書赤爵赤箭霞曳從以炎官

### 乾德南郊壇

四年九月乙卯改築南郊壇

從於舊壇南五里俄罷之

### 太平興國黃帝壇

興國八年十月戊子詔祀土德於黃帝壇珪幣牢具如大祠制俾祠官領之

雍熙先農壇 紹興觀耕壇

見藉田

雍熙四年九月二十七日詔來年正月親耕二十八日命宋白賈黃中等定儀注十月一日詳定所言北齊壇高九尺廣輪三十六尺四陞三壝四門唐制高五尺周迴四十步今請壇高九尺周圍四十步飾以青唐祀先農長安在通化門外十里洛陽在上東門外七里今請於朝陽門七里外十五里內為壇十五

日禮儀使言宋齊之制於先農壇東立觀耕臺請築臺高五尺周四十步四出陛飾以青二十一日詳定所又言先農壇設二壇樂懸二舞俱在壇前請定御耕位在壇城東南外壇設於大次御耕位觀耕臺樂懸之外端拱元年正月十七日親饗神農氏于壇以后稷配淳化元年五月二十三日禮官言端拱親耕壇設兩壇無周圍步數請四面各封五十步為兩壇壇各五十步從之景德四年十二月庚戌判禮院孫奭言六典禮閣新儀皆言吉亥饗先農今以正月一日望改用正月上辛後亥日詔

禮官議從其請明道元年十二月庚子詔以來年二月丁未籍田就端拱壇位耕地因加修飾二十五日以農壇三壇地狹請自外壇十步限以青繩元豐二年十月詔於京城東南度地十

畝為藉田置令一員徙先農壇於其中立神倉於東南

以郊社令辛公

祐兼藉田令

冬則藏冰凡祠祭取具焉三年五月九日王存請以千

畝為藉田百畝建先農壇兆神倉齋官并耕作廬舍之類繪圖

上之紹興十五年十一月十七日詔以來歲之春祇祓青壇親

載黛耜十六年正月五日定饗先農儀注二十一日行禮

壇在嘉會

門外南四里  
玉津園之南

袞冕執大圭入正門宮懸奏靜安之樂儲  
靈錫慶之舞三成止皇帝升壇耕耤使從登歌奏嘉安  
之樂奠鎮圭於繅藉奠幣奉俎宮懸豐安之樂作升壇  
登歌奏禧安之樂執爵祭酒文舞退武舞進宮懸正安  
之樂作皇帝飲福受胙登歌歆安之樂作賜行事陪祠  
官胙宮懸乃奏靜安之樂一成止

景德壽星壇

景德二年八月辛未朔知樞密院事王欽若上言謹按



月令八月命有司秋分日享壽星于南郊唐會要開元

二十四年七月勅

七月庚寅

上封事者言日月會于壽星居

列宿之長令所司特置壽星壇二十六日勅以千秋節

日祭老人星及角亢七宿方今三代之禮莫不兼修百

神之祠於焉咸秩而蕭薌之祭獨略壽星望詔禮官俾

崇祠事詔禮院檢討以聞禮院言案月令注云秋分日

祭壽星於南郊壽星南極老人星也爾雅云壽星角亢

也注數起角亢列宿之長故曰壽唐開元二十四年上

封事者言月令云八月日月會于壽星居列宿長請八月社日配壽星于太社壇饗之當時勅置壇常以千秋節日祭老人及角亢七宿著之常式今叅詳享壽星及角亢七宿請用祀靈星小祠禮例其壇亦依靈星壇制度築於南郊以秋分日祭之詔可

壇在南薰門外七里

祥符二年

九月庚午詔自今郊祀列周伯星位于氏宿壽星之次從邢中和之請也元豐四年十月止設老人星一位南向壇下七宿皆不設位紹興七年五月十一日太常博

士黃積厚請秋分日享壽星從之用籩一豆一著尊一

景德先蠶壇

見親蠶類 景德中判太常寺李宗諤以諸神祠壇多缺外壇之制因深塹列木以表之營葺齋室月視其缺

咸平九宮貴神壇 祥符九宮壇 紹興九宮

壇

國朝初承唐制祀于東郊

建壇于朝陽門外與青帝隣

咸平四年三

月二十四日直祕閣杜鎬言今禮以五帝為大祀太一

為中祀九宮所主風雨霜雪雷電疾疫之事請復為大

祀從之

學士宋白等議御書祝版禮同社稷增設壇八兩壝玉用兩圭有卽藉藁結加褥如幣色

月七日詔以九宮壇不合禮禮官請第一成四方各一

百二十尺高三尺再成各一百尺高如之壇上小壇九

每壇縱廣八尺各相去一丈六尺列祭器及公卿酌奠

郊祀錄九宮壇在京城東壇三成成三尺四階小壇九階高一尺九寸縱廣八尺又西南為一階曰坤道人門

景德二年十月十六日王欽若言往者列九宮為大祀

靈心合谷景福並轉祥符元年東封八月壬辰詔俯邇

岱宗別興壇壇癸巳

五日

於泰山行宮東別建壇二成

三尺四階其上小壇九高一尺五寸四面各八尺壇下

四面為兩壝各二十五步三年十一月以將祀汾陰命

向敏中祀九宮六年九月十六日禮官言恭謝天地遣

官祭初唐天寶三載蘓嘉慶言九宮位隨歲改謂之

行棊飛位自乾元後止用一局失飛宮之位景祐二年

乙亥歲司天監生于淵與役人單訓議其失請依九宮

太一經飛位詔學士章得象詳定四月七日庚申得象等言按郗良遇九宮法有飛棊立成圖每歲一移兼推九州所主災害之法唐天寶中祭以四孟隨歲改位行棊謂之飛位今淵所請合天寶之禮良遇之圖請祭九宮之時命司天監一員赴祠所隨每年貴神飛棊之方以定祭位從之

其法自天聖七年己巳入歷太一在一宮歲進一位飛棊周而復始治平

元年五月四日己亥學士胡宿言貴神實司水旱請水旱命官祈禱詔禮官議從之紹興十八年五月甲戌太

常簿林大鼐請建九宮壇六月十八日詔於國城之東

建壇壇制二成高三尺闊五丈上設小壇九廣八尺各

高一尺五寸壇下四面為兩墻各二十五步

在東青門外一里

先是十三年太常丞朱輅請舉行祀典至是禮官言十

神太一九宮太一皆天之貴神國朝分而為二並為大

祀比新太一宮而九宮屋而不壇與小祀雜請擇地重

建故也

禮如感帝咸平制與此同酌天寶之舊儀循祥符之定制

元豐六年二

月何洵直請每位皆一牢

樂章云靈壇九位直符處中元祐六年閏八月以飛位

不常易之

崇寧三年四月十三日禮官請用禮神玉大觀四

年改用圭璧 燧人觀斗極而定方名庖羲因河圖

而畫八卦黃帝造甲子定歷數八卦九宮之義由是

興焉

招搖權星太陰天一  
符太一攝提咸池青龍

漢張衡傳聖人明審

律歷以定吉凶重之以卜筮雜之以九宮注易乾鑿

度曰太一取其數以行九宮鄭康成注云太一者北

辰神名也下行八卦之宮起於坎終於離也 唐明

皇肅宗嘗親祠太和降為中祀會昌復重其禮以宰



相修祠事

祥符風伯雨師壇

太平興國三年十一月北征遣官祭風伯雨師壇用少

牢

行磔風之祭

祥符二年四月二十六日澤州請建廟命禮

官考其儀有司言唐制諸郡置風伯壇于社壇東雨師

壇于西

國朝每歲以立春後丑日祭風伯立夏後申日祭雨師雷師

元豐四年十月

詳定禮文所請稽四類之義兆風師於西郊祠以立春

後丑兆雨師於北郊祠以立夏後申兆司中司命司民

司祿於南郊祠以立冬後亥壇兆從其氣類祭辰從其星位  
雨師雷師為一壇同壝司中司命司民司祿為四壇同壝壇  
制高廣如舊制周制大宗伯以禋燎祀風師雨師

注云風師箕  
雨師畢也

後漢以丙戌日祀風師於戌地以巳丑日祀雨師於丑地牲  
用羊豕唐天寶四載勅風伯雨師升中祀諸郡各置一壇因  
春秋祭社之日同祀九月勅諸郡風伯壇置社壇之東雨師  
壇之西五載四月詔祀雨師以雷師同壇祭共牲別置祭器

### 康定大火壇

寶錄康定元年七月戊午

五日

太常博士集賢校理胡

宿言竊聞南京鴻慶宮災此上天示變以告人主臣未暇推言災異願國家修火祀謹按春秋士弱對晉侯曰古之火正或食於心或食於味陶唐之火正曰閼伯居商丘祀大火紀時焉說者曰火正火官也掌祭火星行火政後世以為火祖相土契之曾孫代閼伯後主火星宋其後也商丘在今南京太祖受命之地當房星之次以宋建號用火紀德實本於此至真宗

祥符七年正月始建

京邑號為三都

南京正殿以  
離明為名

則闕伯之神上配大火祀

典尤宜超異今闕伯祀在商丘之上丘高二十餘丈祠  
屋制度狹小又不領於天子之祀官歲時但府吏享祀  
非報本尊始崇神秩祀之意願詔太常列於祠官春秋  
二時遣使持祝版祠具或遣近臣或委留司長吏攝行  
祠事對祭大火仍崇飾祠宇以申嚴奉詔禮院詳定以  
聞十月辛丑十七日宿又言春秋傳高辛二子長曰闕伯  
遷於商丘主辰故辰為商星且五行之官祀為貴神五

時祀之謂之五祀大辰房心尾也大火謂之大辰周官保章氏分星鄭氏云大火宋也左氏傳曰宋大辰之墟漢地理志宋房心之分野按圖經云商丘在宋城縣西南二里高八十丈周迴二百步今闕伯之祠直當其上盖房心天帝之明堂太祖於此受命傳序四聖享祀弗及又按國語董因曰君之出也歲在大火闕伯之星也是為大辰辰以成善又曰嗣續其祖如穀之滋韋昭以為辰為農祥周先后稷之所經緯以成善道則東方七

宿房心通有農祥之稱若因舊丘古祠除壇對祭不惟  
講修火政亦足以祈求年豐詔厥子孫永錫純嘏禮院  
言關伯為高辛火正實居商丘主祀大火能宿其官後  
世因之祀為貴神配火侑食亦如周棄配稷后土配社  
之北宜因興王之地商丘之舊作為壇兆秩祭大火以  
關伯配之其關伯舊廟并壇兆之制官為修崇每遇辰  
戌出納之月內降祝版詔留司長吏奉行祭事遵豆牲  
幣視中祀於是令禮官詳定十二月乙酉禮院上言南

京大火壇高五尺廣二丈出四陛陛五尺墻一重四面距壇各二十五步位版以黑漆朱書曰大火位配位曰閼伯位牲用羊一豕一器準中祠歲以三月九日擇日命南京長吏及以次官分三獻攝祠從之

一本云詔陪京尹正之臣

行事

慶歷七年二月十六日胡宿又請增葺壇場及商

丘祠宇詔南京增修靖國元年建陽德觀崇奉熒惑

政和

六年六月五日幸陽德觀

崇寧元年七月甲申朔建長生宮以祀熒

惑四年七月六日禮官請於南郊赤帝壇外為熒惑壇

以時致祭大觀三年七月封關伯商丘公廟曰光德紹興二年十二月丙申博士趙霈請設位望祭三年正月癸酉初復大火之祭七年六月禮官討論於辰戌之月依五方帝之禮望祭十八年五月四日辛酉禮官請建一殿奉火德配以關伯其後建于太一宮道院名曰明離宋城縣關伯廟曰光德紹興七年三月加封王爵錫諡宣明高辛有祝融陶唐有關伯士弱之對晉侯公孫僑之告叔向

慶厯欽天壇



紀慶厯三年五月辛卯築欽天壇于禁中 仁宗事天  
地齋栗或時災變必跣足露立致禱于禁中 凡水旱  
甚則車駕親禱寺觀仁宗八 皆為旱

皇祐五帝壇

禮志四立土王日祀五方帝青帝壇高七尺方六步四  
尺赤帝壇高六尺東西六步三尺南北六步二尺黃帝  
壇高四尺方七步白帝壇高七尺東西七步南北七步  
一尺黑帝壇高五尺方三丈七尺皇祐定壇如唐郊祀

錄各廣四丈其高用五行八七五九六為尺數

皇祐五年閏月定諸

壇

### 皇祐地祇壇

志皇祐三年禮官馮浩言皇地祇壇各再成面廣四丈九尺東西四丈六尺上等高四尺五寸下等高五尺方五丈三尺陞廣三尺五寸大抵卑陋不應禮典禮院請如郊祀錄增廣五年諸壇皆改孟冬祭神州地祇壇方三丈一尺皇祐定壇高三尺廣四十八步四出陛

皇祐朝日月壇

志皇祐五年定朝日壇舊高七尺東西六步一尺五寸  
增脩高八尺廣四丈如唐郊祀錄夕月壇與隋唐制度  
不合從舊則壇小如唐則坎狹定坎深三尺廣四丈壇  
高一尺廣二丈四方為陞降入坎中然後升壇

皇祐先農壇 先蠶壇

志立春後亥日享先農壇高九尺東西十步南北十步  
三尺明道二年二月親耕籍田修飾先農壇如雍熙制

皇祐定壇高五尺周四十步如唐制季春吉已享先蠶  
壇高四尺五寸周四步二尺皇祐定壇如新禮高五尺  
方四丈四出陛陸各五尺

### 元豐四望壇

元豐二年知湖州陳侂請依周禮建於四郊八月詳定  
禮文所言小宗伯兆四望鄭注為壇之營域祭法四坎  
壇祭四方也

壇以祭山川丘陵  
坎以祭山谷泉澤

魏立四望位於祭地壇

隋史官南郊圖有東西南北望之位各居其方唐開元

禮祈嶽鎮四瀆于郊四方山川各附嶽瀆下請兆四望

於四郊每方嶽鎮海瀆共為一壇望祭

以五時迎氣日祭之用血祭瘞

經

四年三月禮官言五時望祭製兩圭有邸及瘞玉六

年二月請每位皆一牢八月脩白帝夕月西方嶽鎮海

瀆馬祖四壇政和三年八月加四鎮王封建炎元年九

月四日常少滕康請如虞望秩周時邁循幸祭所過名

山大川詔望祭紹興七年五月十一日舉嶽瀆祀典從

博士黃積厚之言也

元豐雩壇

五年七月己丑

五日

禮部奏太常參詳雩壇當立圜壇

於南郊之左巳地依郊壇遠近高一丈廣輪四丈周十

二丈四陞為三壇二十五步周垣四門燎垣一如郊壇

之制從之

祀上帝以太宗配

元豐朝日夕月壇

天禧元年四月戊寅

十日

監察御史王博文言祀稱夕

月壇號夜明黼居晝祭恐未合宜請於未後三刻行禮

從之

唐劉禹錫夕月壇詩注云其禮用畫

元豐六年正月二十三日禮部

言熙寧祀儀朝日壇廣四丈夕月壇廣二丈以唐王涇

郊祀錄考之夕月壇方廣四丈今止方二丈比日壇甫

及其半望改造夜明壇為坎深三尺從廣四丈為壇於

坎中高一尺方廣四丈從之紹興三年四月十五日司

封郎鄭士彥上言始舉祀典

於惠照院望祭齋宮行事元祐七年三月庚寅詔

朝日夕月去祀字

建炎受命中興壇

高宗即位于南京建炎元年五月庚寅朔王登壇告天  
禮畢即位于府之正衙壇在府治中門之東實耿延禧  
建議所築後名曰受命中興之壇 漢高在汜光武在  
鄱魏受漢禪設壇繁陽 即位壇王者所以興也漢鄱  
南魏繁陽壇至今皆在

### 紹興園丘

紹興十三年三月丙午詔修築園丘于龍華寺之西

是先

二月二十五日命  
楊存中等相視

壇四成上成縱廣七丈下成二十有



二丈分十三陛陞七十有二級壇及內壇凡九十步中  
壇外壇共二十五步以龍華寺為望祭殿不築齋宮十  
一月二十九日太常禮部言已修建圓壇凡祀天及非  
時慶賀奏告宜於本壇行禮從之

先是建炎二年於江都縣築壇十一月壬

寅祀昊天上帝奉太祖配自元符三年再罷合祀因不  
改紹興十三年十一月庚申郊祀始復合祭設大神大  
示及太祖太宗配位十六年十一月丙子再郊十九年  
十一月壬辰二十二年十一月戊申二十五年十一月  
癸亥二十八年十一月己卯郊乾道五年九月十一日林栗等言歲祀

上帝者四春祈夏雩秋饗冬報其二在南郊圓壇其二

在城南惠照院望祭齋宮今未建雩壇端誠殿欲四祭

並即圓壇以遵舊制從之

紹興圓丘在嘉會門外南四里

中興祀

典冬至圓丘夏至皇地祇

太祖配

孟春祈穀孟夏雩

祀神州地祇

並太宗配

季秋明堂

淳熙十六年改高宗配

感生帝

僖祖

配已上宰執充獻官

高禘

青帝配以太昊高辛

朝日

大明夜

九宮貴神

太一攝提權星招搖天符青龍咸池太陰天一

熒惑

商丘宣明王配

太社太稷

土正后稷

出

火納火祀大辰

宣明王配

蜡祭

東蜡大明配以神農后稷西蜡夜明配

以神農南蜡神農

無配北蜡神農配以后稷

五方嶽鎮

無配

四海四瀆

無配

風雨雷師

無配先

農

神農后稷配

先蠶

至聖文宣王

充鄒公配

昭烈武成王

留侯配

祚

德廟

強濟英畧啟佑公今為忠佑顯應慶善崇福王忠利彰應慶遠隆福王忠濟靈應慶順嘉福王

紹興初大祀三十有六止行二十三其五帝神州蜡祭

等十年祭皆為中祀二十七年五月辛卯

一云四月二十六日

僚建請復為大祀乾道四年九月十九日禮部郎李濤

請復岳瀆農蠶風雨雷師之祀從之

玉海卷一百一